

137

finden möcht, seinem vater zu bringen, welches dann ain  
farb ist, damit man die schwarze tüecher ferbt und theur  
verkauft wurt. Wie er nun lang im bürg umbher gangen,  
do ist in einer klingen oder finstern thele ein erdenmendle  
5 zu im kommen, das hat ein langen growen bart gehapt und  
dem knaben freintlich zugesprochen und beredt, das er mit  
im weit in den perg hinein gangen. Also hat den jungen  
bedeucht, es seie ain grose weite im berg, auch seer hüpsch  
und glütze, wie ein clares goldt. Wie nun das mendlin  
10 den knaben ain guete weil im gepürg umbher gefiert, hat  
es ime letstlich etliche alte und unerante stuck goldes ge-  
schenkt, ime darbei angezaigt, er solle des andern tags  
widerumb an das ort des pergs kommen und niemands, er  
sei, wer er welle, sagen, wo er gewesen oder was er ge-  
15 sehen; [1085] dann so er das überfare, werdt er gewiss-  
lichen sterben müesen. Gleichwol mege er das gelt seinem  
vatter zustellen, iedoch soll er nit melden, woher im das  
kom. Und damit hat das erdenmendle den knaben ohne  
allen nachtail wider von ime abschaiden lasen. Wie der  
20 haimkommen und seim alten vater die stuck golts geben,  
hat er in wol damit erfrewt, iedoch hat er wissen wellen,  
woher im das gelt komme, und vermaint, er habs villeucht  
ongebetten entlehnet. Aber der knab ist so standthafft und  
bedacht gewest, das ers dem vatter verschwigen. Des an-  
25 dern tags ist der knab, wie in das erdmendlin beschaiden,  
an das verzilt ort am gebürg kommen. Do hat er das  
mendle abermals gefunden, welches in wider in den berg  
geführt. Darin ist der knab bis an dritten tag bliben, hie-  
zwischen im das erdenmendle zu essen und zu trinken geben,  
30 auch sonst wol gehalten, darneben den knaben bericht,  
wann er das drit mal in berg kommen, wie er im dann die  
zeit ernennt, so werdt es user dem perg erleset und zu  
gnad, auch ewiger frewdte kommen. Darbei dem knaben  
die gefar abermaln fürgehalten, die inen baiden darauf  
35 stände, so ers sagen und öffnen werde vor der gepürlichen  
zeit, namlichen ime, erdenmendle, der höchst schatz, die  
selligkait, sodann dem knaben der schnell zeitlich todt.  
Damit hat das erdenmendle den knaben am dritten tag  
wider von sich gelassen, gleichwol ime widerumb etliche un-  
40 erkante stuck goldts und gelts, wie vormals, gegeben. Also

10 gepürg] hs. gepur.